



13 Disember 2017  
13 December 2017  
P.U. (A) 386

# WARTA KERAJAAN PERSEKUTUAN

## *FEDERAL GOVERNMENT GAZETTE*

### PERATURAN-PERATURAN PENCEGAHAN JENAYAH (KAD PENGENALAN) 2017

### *PREVENTION OF CRIME (IDENTITY CARD) REGULATIONS 2017*

DISIARKAN OLEH/  
PUBLISHED BY  
JABATAN PEGUAM NEGARA/  
ATTORNEY GENERAL'S CHAMBERS

AKTA PENCEGAHAN JENAYAH 1959

PERATURAN-PERATURAN PENCEGAHAN JENAYAH (KAD PENGENALAN) 2017

PADA menjalankan kuasa yang diberikan oleh perenggan 23(2)(b) Akta Pencegahan Jenayah 1959 [*Akta 297*], Menteri membuat peraturan-peraturan yang berikut:

**Nama dan permulaan kuat kuasa**

1. (1) Peraturan-peraturan ini bolehlah dinamakan **Peraturan-Peraturan Pencegahan Jenayah (Kad Pengenalan) 2017**.

(2) Peraturan-Peraturan ini mula berkuat kuasa pada 15 Disember 2017.

**Tafsiran**

2. Dalam Peraturan-Peraturan ini, melainkan jika konteksnya menghendaki makna yang lain—

“kad pengenalan” ertinya kad pengenalan yang dikeluarkan di bawah subperaturan 3(3);

“Ketua Pengarah” ertinya Ketua Pengarah Pendaftaran Negara yang dilantik di bawah seksyen 3 Akta Pendaftaran Negara 1959 [*Akta 78*];

“pegawai pendaftaran” ertinya mana-mana orang yang dilantik di bawah seksyen 3, 3A atau 3B Akta Pendaftaran Negara 1959.

**Permohonan kad pengenalan**

3. (1) Orang berdaftar hendaklah, dalam tempoh tujuh hari dari tarikh orang berdaftar itu didaftarkan di bawah Akta, membuat permohonan bagi suatu kad pengenalan.

(2) Apabila orang berdaftar membuat permohonan bagi suatu kad pengenalan, orang berdaftar itu hendaklah menyerahkan kad pengenalan asalnya atau

dokumen pengenalan sementara yang dikeluarkan kepadanya di bawah Peraturan-Peraturan Pendaftaran Negara 1990 [*P.U. (A) 472/1990*] kepada pegawai pendaftaran bagi maksud pembatalan.

(3) Ketua Pengarah hendaklah, apabila menerima permohonan daripada orang berdaftar, mengeluarkan suatu kad pengenalan berwarna coklat yang mengandungi apa-apa kod dan maklumat sebagaimana yang ditentukan oleh Ketua Pengarah kepada orang berdaftar itu.

(4) Mana-mana orang berdaftar yang melanggar subperaturan (1) melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

#### **Jagaan dan simpanan selamat kad pengenalan**

4. (1) Jika orang berdaftar yang kepadanya suatu kad pengenalan telah dikeluarkan diletakkan di bawah suatu perintah pengawasan, orang berdaftar itu hendaklah bertanggungjawab untuk menjaga kad pengenalan itu dan hendaklah membawa kad pengenalan itu pada setiap masa.

(2) Jika orang berdaftar yang kepadanya suatu kad pengenalan telah dikeluarkan ditahan di bawah suatu perintah tahanan, orang berdaftar itu hendaklah menyerahkan kad pengenalan itu kepada pegawai penjara untuk simpanan selamat.

(3) Mana-mana orang berdaftar yang melanggar subperaturan (1) atau (2) melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

#### **Pengemukaan dan pemeriksaan kad pengenalan**

5. (1) Orang berdaftar hendaklah, apabila diminta oleh mana-mana pegawai pendaftaran atau pegawai polis, mengemukakan kad pengenalannya untuk diperiksa.

(2) Mana-mana orang berdaftar yang melanggar subperaturan (1) melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

### **Pembetulan atau pengubahan butiran**

6. Jika terdapat apa-apa kesilapan atau perubahan maklumat dalam sesuatu kad pengenalan, orang berdaftar yang kepadanya kad pengenalan itu dikeluarkan hendaklah membuat permohonan untuk membetulkan kesilapan atau mengubah butiran dalam kad pengenalan itu.

### **Pengubahan pada kad pengenalan adalah dilarang**

7. (1) Tiada seorang pun, selain pegawai pendaftaran yang bertindak dalam menjalankan tugasnya, boleh membuat apa-apa tanda, endorsan atau catatan pada, memadam, mengganggu, membatalkan atau mengubah apa-apa tanda, endorsan atau catatan yang terkandung dalam, atau selainnya mencacatkan atau memusnahkan, sesuatu kad pengenalan atau salinannya.

(2) Mana-mana orang yang melanggar subperaturan (1) melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

### **Penggantian kad pengenalan**

8. (1) Jika suatu kad pengenalan yang dikeluarkan kepada orang berdaftar hilang, musnah, rosak atau cacat, orang berdaftar itu hendaklah, tanpa kelengahan tidak wajar, membuat laporan polis.

(2) Selepas membuat laporan polis, orang berdaftar itu hendaklah memohon untuk menggantikan kad pengenalan yang hilang, musnah, rosak atau cacat itu.

(3) Permohonan bagi penggantian kad pengenalan hendaklah disertakan dengan fi yang berikut:

(a) bagi permohonan pertama, fi ialah satu ratus ringgit;

(b) bagi permohonan kedua, fi ialah tiga ratus ringgit; dan

(c) bagi permohonan ketiga dan kemudiannya, fi ialah satu ribu ringgit.

(4) Mana-mana orang berdaftar yang melanggar subperaturan (1) melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

### **Pembatalan kad pengenalan**

9. (1) Jika sesuatu perintah pengawasan atau perintah tahanan terhadap orang berdaftar dibatalkan oleh Lembaga atau telah tamat tempoh, orang berdaftar itu yang kepadanya telah dikeluarkan suatu kad pengenalan hendaklah membuat permohonan untuk membatalkan kad pengenalan itu.

(2) Mana-mana orang berdaftar yang melanggar subperaturan (1) melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

### **Larangan memiliki kad pengenalan selain yang dikeluarkan di bawah Peraturan-Peraturan ini**

10. (1) Orang berdaftar tidak boleh memiliki apa-apa kad pengenalan selain kad pengenalan yang dikeluarkan di bawah Peraturan-Peraturan ini.

(2) Mana-mana orang berdaftar yang melanggar subperaturan (1) melakukan suatu kesalahan dan boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

### **Daftar**

11. Ketua Pengarah hendaklah menyimpan dan menyenggara suatu daftar orang yang telah dikeluarkan kad pengenalan di bawah Peraturan-Peraturan ini.